

OKRUŽNI SUD U ISTOČNOM SARAJEVU I ODJELJENJE OSNOVNOG SUDA SOKOLAC DOBILI NOVE I RENOVIRANE PROSTORIJE

- Projekat planiralo i provelo Visoko sudsko i tužilačko vijeće Bosne i Hercegovine (VSTVBiH);
- Renoviranje zgrade Suda zajednički finansirale Vlada Kraljevine Norveške i Vlada Republike Srpske;
- Opština Istočno Novo Sarajevo obezbijedila korištenje zgrade bivše kasarne;
- Alisei, nevladina organizacija koja djeluje u Bosni i Hercegovini, odabrana je kao partner za implementaciju projekta opravke i renoviranja.

O OKRUŽNOM SUDU...

Okružni sud u Istočnom Sarajevu osnovan je 1992. godine. Ovaj sud pokriva 14 političkih opština, na čijoj teritoriji živi blizu 160.000 stanovnika.

Okružni sud u Istočnom Sarajevu ima 8 sudija i 27 ostalih radnika koji obavljaju administrativno-tehničke i pomoćno-tehničke poslove u sudu. Sud obuhvata područje tri osnovna suda.

O ODJELJENJU OSNOVNOG SUDA SOKOLAC...

U Istočnom Sarajevu smješteno je i Odjeljenje Osnovnog suda Sokolac, jer je većina njegovih korisnika smještena upravo na tom području. Razdaljina između sjedišta Suda i Odjeljenja je oko 50 kilometara. Osnovni sud Sokolac ima 14 sudija i 48 ostalih radnika. U njegovom odjeljenju u Istočnom Sarajevu radi 5 sudija i odgovarajući broj pomoćnog osoblja.



INFORMACIJE O PROJEKTU

Već u avgustu 2004. godine Opština Istočno Novo Sarajevo je dodijelila zgradu kasarne "Slobodan Princip-Seljo" na korištenje Okružnom sudu Istočno Sarajevo. Međutim, zgradu je trebalo značajno rekonstruisati kako bi je Okružni sud Istočno Sarajevo mogao koristiti.

VSTVBiH je u 2006. godini proveo detaljnu analizu stanja i izvršio procjenu troškova za rekonstrukciju svih prvostepenih i drugostepenih sudova u BiH. Ukupni troškovi rekonstrukcije su procijenjeni na oko 30 miliona KM.

Ova analiza je pokazala da je pored hitne potrebe izmještanja Okružnog suda Istočno Sarajevo, koje je radilo u izuzetno teškim uslovima, također bilo potrebno izmjestiti i Odjeljenje Osnovnog suda Sokolac u nove prostorije.



Između VSTVBiH, Vlade Kraljevine Norveške i Vlade RS-a je dogovoreno da Norveška obezbijedi 490.000 EUR, a da Republika Srpska obezbijedi 100.000 EUR za radove kojima bi se Okružni sud Istočno Sarajevo smjestio u prostorije koje je obezbijedila Opština. Memorandum o razumijevanju potpisan je u septembru 2006. godine.

Tokom izrade detaljnog tehničkog plana, VSTVBiH je zaključio da se teško stanje Odjeljenja Osnovnog suda Sokolac također može riješiti u okviru istog projekta uz dodatna sredstva od 150.000 EUR. Ova dodatna sredstva je naknadno velikodušno obezbijedila Vlada Kraljevine Norveške.



VLADA KRALJEVINE NORVEŠKE DONIRALA 640.000 EUR



Jan Braathu, ambasador Kraljevine Norveške u BiH

”Norveška podržava reformu pravosuđa u BiH od 2001. godine. U početnoj fazi, reforma je bila usmjerena na uspostavu nezavisnog i odgovornog pravosuđa, prvenstveno kroz uspostavljanje Visokog sudskog i tužilačkog vijeća Bosne i Hercegovine i proces ponovnog imenovanja. Sada je reforma usmjerena na efikasnost i kvalitet pravosuđa.

Od vitalnog je značaja uspostavljanje povjerenja u pravosuđe. Stoga se efikasnost pravosuđa mora postići samo kroz kvalitetne postupke i odluke. Uslovi za rad u sudovima i tužilaštvima utiču na kvalitet i efikasnost. Izgradnja funkcionalnih sudskih prostorija je jedan od načina postizanja efikasnog radnog okruženja. To je također i način da se obezbijedi dobra usluga građanima u okviru pravosudnog sektora.

VSTVBiH je prepoznao važnost funkcionalnosti sudova, a Norveškoj je drago što je mogla dati doprinos u tom pravcu.

Trenutno, Okružni sud Istočno Sarajevo i Odjeljenje Osnovnog suda Sokolac su smješteni u neodgovarajućim prostorijama, bez osnovnih uslova za normalan rad.

Stoga sam uvjeren da će nove prostorije Okružnog suda Istočno Sarajevo i Odjeljenja Osnovnog suda Sokolac dobro služiti i uposlenicima i građanima.

Norveška i dalje nastavlja sa podrškom reformi pravosuđa u Bosni i Hercegovini, a to ćemo realizovati kroz aktivnu saradnju sa Visokim sudskim i tužilačkim vijećem i drugim pravosudnim institucijama. Naš cilj je podržati nezavisno i nepristrano pravosuđe u BiH u koje građani imaju puno povjerenje. To je uzvišeni cilj, koji je u potpunosti ostvariv. Postignut je napredak. Zajedno se moramo pobrinuti da se napredak i dalje postiže.”



VLADA REPUBLIKE SRPSKE IZDOJILA 190.000 KM



Džerard Selman, ministar pravde Republike Srpske

”Otvaranje rekonstruisane zgrade Okružnog suda Istočno Sarajevo i Odjeljenja Osnovnog suda Sokolac je veoma značajan događaj za pravosuđe Republike Srpske i BiH, pogotovu ako se zna da je to zajednička investicija Vlade Republike Srpske i Vlade Norveške, a koja može biti primjer za dalja ulaganja u pravosudni sistem Republike Srpske i Bosne i Hercegovine. Obezbeđivanje smještajnih kapaciteta, materijalno-tehničkih uslova i kadrovsko jačanje pravosudnih institucija je od velikog značaja za daljnje sprovođenje reforme pravosuđa u Republici Srpskoj i Bosni i Hercegovini.”



Branko Perić, predsjednik VSTVBiH

“Građani Bosne i Hercegovine imaju pravo da sudovi efikasno i kvalitetno rješavaju njihove predmete, a VSTVBiH ima stratešku odgovornost da osigura ostvarenje ovog prava. Međutim, izgradnja efikasnog pravosudnog sistema u BiH zahtijeva dugogodišnje investiranje u razvoj ljudskih resursa (edukacija), fizičku infrastrukturu (zgrade) i modernu opremu.

Trenutno većina sudova u BiH nema osnovne uslove za efikasan rad. Konkretno, nedostaju sudnice, prostor za medijaciju, funkcionalne pisarne i prostor za arhivu. VSTVBiH procjenjuje da je potrebno oko 30 miliona KM kako bi se otvorili osnovni uslovi za efikasno pravosuđe, te aktivno lobiramo za podršku domaćih i međunarodnih institucija u prikupljanju sredstava.

Ovom prilikom se želim zahvaliti Vladi Norveške na višegodišnjoj, izdašnoj podršci reformi pravosuđa u BiH, a posebno podršci u rekonstrukciji i izgradnji nove zgrade suda za Okružni sud Istočno Sarajevo i Odjeljenje Osnovog sud Sokolac.

Također se želim zahvaliti Vladi RS-a i Opštini Istočno Novo Sarajevo na njihovoj pomoći u realizaciji ovog projekta.

Čvrsto vjerujem da se uspješni zajednički rad međunarodnih, domaćih i lokalnih partnera u ovom projektu treba prenijeti i na druge lokacije, kako bismo obavili najosnovnije adaptacije svih sudskih zgrada u BiH u razumnom roku.”

Bogdanka Dabić-Jovičić, predsjednica Okružnog suda u Istočnom Sarajevu

“Renoviranje i adaptacija zgrade Okružnog suda u Istočnom Sarajevu je projekat u koji smo iskreno vjerovali i čiju smo realizaciju željno čekali, jer nam je bila velika želja da se stvore bolji uslovi za rad Suda, dostojni obnašanja pravosudne funkcije jedne države. Zbog toga smo izuzetno zahvalni Vladama Norveške i Republike Srpske, te Opštini Istočno Novo Sarajevo, jer njihova pomoć Sudu doprinosi očuvanju nezavisnosti bosanskohercegovačkog pravosuđa.”



RADOVI NA REKONSTRUKCIJI ZAPOČELI U JULU 2007. GODINE

U oktobru 2006. godine Alisei i VSTV BiH potpisali su Ugovor za izradu idejnog i glavnog projekta za rekonstrukciju i dogradnju ovog objekta.

Rekonstrukcija je započela u julu 2007. godine i završena u decembru 2007. godine. Radove je izvelo preduzeće VINDI TIP d.o.o iz Sarajeva.

